

07 MAY 2002

Wakaf-Resolusi

UCAPTAMA DR MAHATHIR AKAN DIBINCANGKAN SEBAGAI RESOLUSI

KUALA LUMPUR, 7 Mei (Bernama) -- Ucaptama Perdana Menteri Datuk Seri Dr Mahathir Mohamad pada Persidangan Ketujuh Menteri-Menteri Wakaf dan Hal Ehwal Islam Ketujuh hari ini akan dibincangkan oleh para perwakilan sebagai kenyataan umum pada hari terakhir persidangan itu esok.

Menteri di Jabatan Perdana Menteri Datuk Abdul Hamid Zainal Abidin berkata beberapa negara berpendapat intipati ucaptama itu bernas dan wajar dijadikan panduan.

"Ucaptama Perdana Menteri tadi hangat diperkatakan malah Menteri Maghribi dan Jordan yang turut anggap ia wajar dijadikan panduan dan intipati ucapan itu patut dijadikan kenyataan umum pada akhir sidang nanti," katanya semasa taklimat harian kepada media, di sini, hari ini.

Katanya kebanyakan delegasi berpendapat intipati yang dilafazkan Dr Mahathir itu lebih bernas daripada pandangan mereka yang kebanyakannya ulama.

"Mereka rasa segala intipati yang dilafazkan (Dr Mahathir) lebih bernas, dan membuat mereka berasa jauh di belakang berbanding pandangan yang dikemukakan oleh perdana menteri," katanya.

Ucaptama Perdana Menteri akan dibincangkan bersama-sama resolusi-resolusi lain pada hari akhir persidangan esok.

Abdul Hamid berkata ada yang menyifatkan Perdana Menteri sebagai mufakkir (pemikir) Islam dan bukan setakat ketua kerajaan sebuah negara Islam.

Dalam ucaptamanya hari ini, Dr Mahathir mengajak umat Islam supaya menilai kembali peranan dalam menegak syiar Islam dan memantap kedudukan dan ekonomi ummah.

Beliau juga mengingatkan ummah agar tidak menyalahkan Islam tetapi mencerminkan diri sendiri ketika mencari punca kemunduran mereka, baik dari segi ekonomi mahupun sosial.

Dr Mahathir berkata pertelingkahan, kedangkalan pemikiran dan sikap tidak mahu menyalahkan diri sendiri kerana menyerahkan nasib kepada takdir adalah antara punca mengapa Islam dan umatnya dikaitkan dengan kemiskinan, kemunduran dan keganasan.

-- BERNAMA

SNS MFJ NAK